

SUKSIS UniMAP SANTUNI SAHUR PASUKAN KESELAMATAN



Oleh : Mohd Basri Basir

Kor Sukarelawan Polis Siswa Siswi (SUKSIS) Universiti Malaysia Perlis (UniMAP) menyantuni pasukan keselamatan yang bertugas di sekitar Kangar dan Arau sempena bulan Ramadan menerusi Program Ronda Mesra Sahur 2019 baru-baru ini.

Program yang julung kalinya diadakan itu bertujuan mengagihkan juadah bersahur kepada anggota-anggota keselamatan dan penyelamat yang bertugas di bulan Ramadan.

Komandan Kor SUKSIS UniMAP Prof. Dr. Mohd Foad Sakdan berkata, program tersebut bertujuan mendekatkan diri pelatih-pelatih Kor SUKSIS UniMAP dengan anggota-anggota keselamatan dan penyelamat di samping menyelami pengorbanan mereka dalam menjaga keamanan dan keselamatan penduduk setempat.

"Selain dari meraikan mereka dengan sumbangan juadah sahur, program ini memberi peluang kepada para pelatih untuk bermesra dan bertanya mengenai bidang tugas yang dijalankan anggota keselamatan."

"Saya percaya program seperti ini akan dapat memberikan pendedahan kepada pelajar sekaligus menjadikan mereka lebih menghargai jasa-jasa para anggota keselamatan dan penyelamat kita," katanya di sini baru-baru ini.

Program Ronda Mesra Sahur 2019 disertai seramai 50 sukarelawan yang terdiri daripada jurulatih dan Pelatih Kor SUKSIS, Jabatan Keselamatan dan Unit Komunikasi Korporat UniMAP serta wakil penaja juadah sahur pengendali rangkaian restoran makanan segera tempatan, Marrybrown Sdn. Bhd. (Marrybrown)

Antara lokasi dikunjungi adalah Ibu Pejabat Polis Kontinjen Kangar, Balai Polis Arau, Simpang Empat, Kuala Perlis, Balai Bomba dan Penyelamat Arau, Kangar dan Kuala Perlis serta Angkatan Pertahanan Awam Kangar dan Kuala Perlis.

Sumbangan bagi juadah sahur Program Ronda Mesra Sahur 2019 ditaja Marrybrown dan Majlis Agama Islam Dan Adat Istiadat Melayu Perlis (MAIPs).

